

Gaxgonq, aen ndaeng duzciengh mbouj lumj seizneix baenzneix raez, cij miz gyoengqvunz daenj gij haizvi nei raez ndwi. Miz duzciengh nyaeq geizheih ndeu, de doiq saeh maz cungj siengj rox daengz daej, ndigah cungj cam neix dwg vihmaz, haenx dwg vihmaz, cam mbouj ndaej dingz. Mbouj dwg cam “vihmaz da max dwg saekhoengz”, couhdwg cam “rieng duzdouq vihmaz baenzneix dinj, rieng noucoengz vihmaz baenzneix raez”, lij cam “vihmaz gwnz ndang loeghozraez miz baenzlai diemj raiz gyaunde, hoeng gou mbouj miz”, baenzngoengz cam haujlai aen vwndiz.

Caengz dap aen vwndiz neix sat, de youh mauh'ok aen vwndiz wnq lo. Daxboh, daxmeh nem au, baj daengj sojmiz caenic de, cungj deng de cam ndaej simnyap daeuq caez. Gyoengqde sim'angq caemhcai hoengq seiz couh han de saek gawq song gawq. Miz saeh guh mbouj ndaej bien seiz, couh mbouj dap de, moeb caekhaex de baez ndeu. Baez daengz seizneix, duzciengh nyaeq hix roxnyinh gig geizgvaiq, siengj mbouj doeng gyoengqde vihmaz moeb caekhaex de. Hoeng, mbouj-guenj duzciengh nyaeq deng moeb geijlai baez, de lijdwg miz maz vwndiz couh cam.

Miz ngoenz ndeu haetromh, daengngoengz ronghsag, duzciengh nyaeq baez hai lwgda, couh bae cam gyoengqvunz aen vwndiz ndeu: “Duz-ngozyiz baeznaengz gwn maz ne?” Gyoengq duzciengh ngamq hwnq-daeuj, cingq gwn gyoijhom, mbouj siengj dam de, couh moeb caekhaex de, hwk ndaej de doq buetdeuz.

Ndaeng Duzciengh

大象的鼻子

□ Mungz Ningz / 蒙宁

Hoeng, de gig vaiq couh lumz in lo, youh hainduj bae cam gizyawz doenghduz aen vwndiz neix. De yawjraen roegdingfaex, couh cam: “Gou cam mwngz, duzngozyiz baeznaengz gwn maz ne?”

Roegdingfaex caeux couh rox duzciengh nyaeq neix cei maij cam vwndiz geizheih, ndigah daegdaengq mbouj cigciep han de, cij naeuz: “Mwngz swheij bae gwnz Dahbop yawjyawj ba!” Duzciengh nyaeq neix baez dingq gig angq, gipmuengz coh Dahbop buet bae.

De ngamq daengz henz Dahbop, yawjraen gwnz rin henz dah heux miz duznuem raiz, couh angqvauvau buet gvaqbae, hai bak couh cam: “Gou cam mwngz, mwngz raen gvaq duzngozyiz lwi?”

Byawz rox duznuem gaenbonj mbouj nyienh dam de, mbouj han fanj cam: “Mwngz cam neix guh maz?” Aenvih duzciengh nyaeq neix maij cam vwndiz lai, aen “mingz ndei” de caeux couh cienz okbae lo. Ndigah duznuem neix baez raen de couh mbouj dajsuenq dam de.

Duzciengh nyaeq neix mbouj cam ndaej dapanq mbouj gamsim, cam aen vwndiz gaxgonq: “Mwngz rox duz-

ngozyiz baeznaengz gwn maz ne?” Duznuem mbouj ok sing, mbehai aen ndang de, fwd aeu rieng moeb caekhaex duzciengh nyaeq neix.

Duzciengh nyaeq neix in ndaej doq ndoj deuz, ndawsim lij gag ngeix: De vihmaz moeb gou? Yienznaeuz deng moeb, hoeng, aen vwndiz “duz-ngozyiz baeznaengz gwn maz” lij yo youq ndaw uk de, de laebdaeb coh henz Dahbop byaij bae.

Sawqmw, duzciengh nyaeq neix fatyienh gwnz Dahbop fouz miz gyaengh faex he, gwnz de miz fouq lwgda ndeu coh de yaepyaep! Duzciengh nyaeq neix couh cam de: “Gou cam mwngz, mwngz raen gvaq duzngozyiz lwi?” Gyaengh faex haenx youh yaepyaep lwgda naeuz: “Gou couhdwg duzngozyiz ha!” Duzciengh nyaeq neix baez dingq angq raixcaix, de siengj: Baezneix cungsuengq ra ndaej aen dapanq vwndiz lo! De cam: “Mwngz baeznaengz gwn maz ne?”

Duzngozyiz nyaenx riu, cang ok gij yienghceij hozunq, sing daemq doiq duzciengh nyaeq neix naeuz: “Gvaqdaej gyawj gou di, lwgciengh nyaeq, gou laeglemx lwnh hawj mwngz!” Duzciengh nyaeq neix laux-saed dwk iet aen gyauej de gvaqbae.

Byawz rox duzngozyiz gaemz ndeu couh haeb aen ndaeng de, haenqrengz rag de coh ndaw dah. Duzciengh nyaeq neix buekmingh coh haenzdah beng. Song de rag bae rag dauq, aen ndaeng duzciengh nyaeq neix yied rag yied raez. Duzciengh nyaeq neix yienznaeuz lij iq, hoeng de miz rengz lai, doeklaeng dauqdaej cengq duet lo. Hoeng, aen ndaeng de cix bienq ndaej miz mij lai raez bae!

Duzciengh nyaeq neix siengsim dangqmaz, doeklaeng aen ndaeng de caeuq caezgya cungj mbouj doxdoengz lo. De rag aen ndaeng raezrang daejfwtfwt coh ranz byaij bae. Sawqmw, miz duznyungz hung he daeuj haeb de, de simnyap dwk baez baet ndaeng raez. Ha! Duznyungz gawqyienz deng moeb dai lo! De mbouj caiq baenzneix siengsim lo, hainduj sawq ning ndaeng raez de. De angq dwk aeu aen ndaeng raez de bae mbaet mak gwnz faex daeuj gwn.....

Ha ha! Siengj mbouj daengz, ndaeng raez lij miz baenzlai ndeicawq! Duzciengh nyaeq neix angqvauvau dwk buet ma ranz. De yienh'ok gij ndeicawq aen ndaeng raez le, sojmiz duzciengh cungj hozhaenz ndaeng raez de, doq cam de baenzlawz bienq ndaej raez. De couh menhmenh gangj okdaej caez.

Doeklaeng gyoengq duzciengh couh buet daengz henz Dahbop bae ra duzngozyiz, yaeuh duzngozyiz haeb aen ndaeng gyoengqde le caiq roengz-rengz rag dauq. Baenzneix, aen ndaeng gyoengq duzciengh cungj ndaej bienq raez lo.

Dangz Goq Hag Eu Fwen He

一节学唱山歌的课

□ Vangz Fungmingz Dangz Gijfungh Dangz Yangauh / 黄凤明 唐启峰 唐彦高

Yaek daengz sam nyied sam, boux lauxsae mehmbwk son caezgya eu fwen.

Lauxsae naengh youq aen daengq doq damz soujfunghginz doq son eu fwen. De maj ndaej gyaunde, gij sing de seksak lumj roeghenj ciuz.

Lauxsae fwd fatyienh gyoengq hagseng riengz eu fwen miz vunz eu loek, lij cab miz sing riu deksdswd. De hai lwgda engq hung bae ra dwg boux hagseng lawz loenghluen.

Seizhaenx, lauxsae cim daeg hagseng ndeu. Daeg haenx ngamq iet fwngz coh naj daengz laeng dahsau naengh youq baihnaj de. Gij sing riu cingq dwg de fat okdaej.


Daeg haenx yawjraen lauxsae yawj coh de, naj hoengzdwdd lumj deng feiz coemh gvaq, lumjbaenz rox swheij guh loek maz nei doq yup fwngz dauq, aen bak hix haep hwnj.

Lauxsae mbouj caiq son caezgya eu fwen, cuengq soujfunghginz youq gyangjdaiz, ndwn hwnjdaej sikhaek heuh daeg hagseng haenx ndwn hwnj eu fwen. Daeg haenx ndwn hwnjdaej, ngaemgyaeuj, fajrwz ndingmaeq, eu mbouj ok saek gawq.

Lauxsae cam de: “Haxbaenh

mwngz guh maz ne, gou son baenzlai baez mwngz vihmaz mbouj rox eu gawq lawz?” Daeg hagseng haenx sing iq dap naeuz: “Gou mbouj guh maz, gou yawjraen laeng de miz duznon, gou bang de dawz roengzdaej, lauxsae mwngz couh yawj gou, doeklaeng couh heuh gou ndwn hwnjdaej eu fwen.” Lauxsae youh cam: “Dawz roengzdaej couh dawz lo, mwngz vihmaz lij riu?” De dap: “Mbouj rox byawz coq duznon youq baihlaeng de, gou raen duznon youq laeng de bin bae bin dauq, de hix mbouj roxnyinh, gou raen ndeiri.”

Lauxsae byaij daengz henz ndang de, ndawsim lij ngeiz dwg mbouj dwg de coq duznon youq laeng dah hagseng. Seizhaenx, miz boux dah hagseng gingz fwngz hwnjdaej. Lauxsae ngaekgyaeuj hawj de ndwn hwnj gangviah. Dah hagseng neix gangj: “Lauxsae, gou yawjraen duznon youq laeng dah gonq, hoeng gou liz ndaej gya, couh heuh de bang dawz roengzdaej.” Lauxsae baez dingq couh hawj song boux hagseng naengh roengz, caemhcai coh daeg hagseng naeuz: “Lauxsae lai-naeuz mwngz hwnjdangz loenghluen, doiq mbouj hwnj. Doeklaeng caiq



Raemxdah caem lae goliux heu.

Dozsw

bungz gij saeh neix, mwngz couh gingz fwngz lwnh hawj lauxsae, rox lwi? “Wn, gou geiq gij vah lauxsae mwngz gangj youq ndawsim lo, doeklaeng mbouj caiq yingyangj caezgya.” Daeg hagseng haenx han naeuz.

Lauxsae riunymnyum, aeu fajfwngz bae lumh aen gyauej daeg hagseng haenx, muengh de mbouj caiq siengj gij saeh haxbaenh, nyinhcaen hag eu fwen. Lauxsae dauq daengz gyangjdaiz dawz soujfunghginz hwnj-daeuj danz, laebdaeb son eu fwen.

Daeg hagseng haenx naengh roengz le, song fwngz coq youq gwnz daizsaw, nyinhcaen hag eu fwen. Dingq ndaej nyi gij sing de lumj raemxrij laelili nei, rwenz raixcaix. Caen dwg siengj mbouj daengz!

Lauxsae gag naemj: Bineix sam nyied sam banh gij doxdax eu fwen, aen ban neix goj ndaej aen mingz lo. Aenvih hagseng aen ban neix doxgiet doxgyaez, caen lumj beixnuengx nei caemhyouq, hab eu fwen wnggai beij ban wnq ndeidingq!